

Reala, UEFAko
bigarren kanporaketan

TALDE TXURI-URDINAK GOL BATEKO ALDEAREKIN EHINGO DIO GAUR UEFAKO BIGARREN KANPORAKETAKO ITZULIKOARI

Realak ezin du huts egin

UEFAko hirugarren kanporaketara pasatzeko oso egokiera ona dauka gaur Realak, 3-2 aldearekin ekingo baitio Anoeta estadioan bertan Dinamo Moskuren kontra. Ezustekoa litzateke Real txapelketatik at gelditzea. Kraussek seguruenik hamaikakoan sartuko ditu Lopez Rekarte, Antia, Gracia, De Pedro eta De Paula.



Ricardo Sa Pinto eta Mikel Antia, atzo arratsaldeko entrenamenduan.

JAGOBA MANTEROLA

Reala, Reala izatera

• ENEKOITZ ESNAOLA •

Nola planteatuko ote du gaurko partidua Kraussek? Realan dagoenetik, bere partidurik garrantzitsuen omen da. Baliteke. Komeniko litzateke, ordea, Kraus gauza arraro edo ezohikoak egiten ez hasia neurketa planteatzeko garaian. Alegia, komeniko litzateke Real Real izatea.

Taldeak lehengo larunbatean aukera ona galdu zuen gaurko lehiara konfiantza handi-handiarekin heltzeko. Kraussek ezohiko eskema zelairatu zuen (4-2-3-1eko), eta ezin da esan justu horregatik galdu zuela Realak eta ohiko 4-4-2koa erabili izan balu emaitza ona lortuko zukeela; izan ere, Rivaldok lehengoan bezalako egun bat edukita, edozein taldek gal lezake partidua Barcelonaren kontra. Baina badaude bi gauza kezagarri. Batetik, talde batek —batik bat Real bezalako ekipo on batek— ezin du aurkariaren arabera planteatu partidua, eta Kraussek hala planteatu zuen, eskema aldatu zuelako. Eta, bestetik, planteamenduan ez zuen ezinbesteko jokalaritzat hartu De Pedro, aulkian utzi zuelako (De Pedro fisikoki ondo ez bazegoen, zergatik ez zuen Kraussek, Valladoliden kontra bezala, taldean sartu Barkero?). Bartzelonan garbi ikusi zen atzean orden pixka bat izanez gero (4-4-2koarekin ere mantentzeko ordena Barçaen aurka) eta erasoan mina eman zez gero (4-4-2koarekin min handiagoa sortzeko moduan izango zen Real), Barcelona ez zela aurkari gaitzetsua.


Neurketa hura pasatu zen, ordea, eta gaur bezalako egunetan orainari heldu behar zaio, Realak aukera paregabea baitu UEFAko bigarren kanporaketa gainditu eta arrakasta usaintzen hasteko. Baina talde batek ohitua dagoen bezala jokatu behar du, are gehiago ohitua horrek orain arte emaitza oso onak eman baldin badizkio.

Enekoitz Esnaola / Donostia

EZUSTERIK EZEAN, UEFAko hirugarren kanporaketara sailkatuko da gaur Real, gaur hamabost 2-3 irabazi zuelako Moskun Dinamoren kontra. Gaurko lehia tramite hutsa izan zitekeen, baldin eta Realak Moskun 0-3koari eutsi izan balio, baina talde txuri-urdinak ez zuen jakin erabakitzen eta txartela gaur irabazi beharko du. Dinamo baino hobea da, baina, Real, eta esandakoa: ezusterik ezean, Realak aurrera egingo du gaur.

Kirol arloan ez ezik, ekonomiko ere oso garrantzitsua da klubarentzat aurrera egitea, diru ugari xahutuko duelako. Jokalariek horren jakitun egon behar dute, eta horregatik ezin du Realak gaur hutsik egin. Gainera, Barcelonaren kontrako porrota ahazteko aitzakia litzateke gaur sailkatzea, nahiz eta horrek ez duen esan nahi Espainiako Ligaz ahaztu beharra duenik taldeak, ez dagoelako ondo sailkatuta eta txapelketa horretan ere maila-emenen hasi behar duelako.

Bernd Kraussek, denboraldi honetan ohi duen bezala, aldaketak egingo ditu gaur hamaikakoan. Hala, oso litekeena da Lopez Rekartek berriro eskuin lateralean jotzea hasieratik,



etxeko partiduetan hala ari delako, Fuentesen orde. Gutxitan, baina kanpoan ere jokatu izan du eskuinetik Lopez Rekartek hasieratik —gaur hamabost Moskun, esate baterako—, eta etxetik kanpo ere ederki jokatzen duela erakutsi zuen orduan, ondo erasotzeaz gain, ondo defenditu zuelako. Lehengo larunbatean Fuentesek egin zuen partidua pattala kontuan hartuta, ikusi egin behar hemendik aurrera Lopez Rekarte titular-titular bihurtzen den.

Halaber, Antia ohiko titularrekin batera entrenatu zen atzo arratsaldean, eta ez litzateke arraroa izango gaur hamaikakoan izatea.

Zelai erdian gutxienez beste aldaketa bat izango da, litekeena delako Kraussek euskarri bat kentzea —Jauregi— De Pedro sartzeko. De Pedrok ez zuen hasieratik jokatu lehengo larunbatean Bartzelonan, ez zegoelako oso ondo fisikoki, baina gaur jokatu egin beharko du, jokalaria biziki garrantzitsua baita eta

Realak ez baitu segurua txartela. Gracia ere hasierako taldean sar daiteke, Kuhbauerren orde. Aurrealdean ere seguruenik aldaketa bat izango da: De Paula, Idiakezaren partez.

Txapuskin atezaina aulkian • Atzo arratsaldean heldu zen Dinamo Mosku Donostiara, eta hotel batean ostatu hartu ostean, Anoeta estadiora abiatu zen, han 18:30etatik aurrera entrenatzeko.

Ez dago oso garbi zer nolako hamaikakoa aterako duen Iartsev entrenatzaileak, baina ia-ia segurtzat jo daiteke Txapuskin atezainak ez duela titular jokatuko. Merezita dauka hark, orain dela bi aste Realaren lehen bi goletan huts nabarmenak egin zituelako. Entrenatzaileak ordu laurdenerako kendu egin zuen. «Gelditzen duen atezain bat nahi dut nik», esan zuen orduan Iartsevek.

Derbiko sarrera guztiak salduta Donostian • Atzo jarri zituen salgai Donostian klub txuri-urdinak igandeko Real-Athletic derbiko sarrerak (3.000 inguru), eta atzo bertan saldu ziren guztiak. Realak 500 sarrera utzi dizkio Athletic, eta baliteke sarrera haiek ere laster agortzea.

Realak ez du klubaren eguna

izendatu derbi hori, eta, beraz, bazkideek ez dute ordaindu beharrik izango. Hori guztia dela eta, Anoeta estadia bete egingo da seguruenik igandean, 17:00etan hasiko da partidua.